

Xujun xi ma joho xi kits'ínkjihí nda postru Pablo xuta ninku Corinto

B'i ts'ín kikjaniñaha Pablo xuta ninku xi tjin nanki Corinto

1 An Pablo, an xi kama nku nda postruhu^a Jesucristo at'aha Ntiana b'a ts'ín kama mjehe. An ko nda nts'eé Timoteo tísuniñaihi jun xuta ninkuhu Ntiana xi tintsu_{bo}o nanki Corinto ko ngatentoo xutaha Ntiana xi tintsu_{bo}o nga ngúsuhun ante Akaya.

²Kas'enuu kjuanda ko kjuajyu xi tsjáná Ntia Na'miná ko Nda Ntiana Jesucristo.

B'i ts'ín y'éjña chji Pablo nga Ntiana kitsjáha nga'yúhun ajihin kjuanima xi j'ajin

³Kan'etsjoho Ntiana, kui xi Ntiah ko Na'mihí Nda Ntiana Jesucristo. Kui xi Na'miná ko Ntiana xi ma nimaha ñá ko xi tehente tsjá nga'yúnná. ⁴Ajihin ngayjee kjuanima xi tíbitjajíaán tsjá nga'yúnná tu xi ko ta ñá ta kama k'uai nga'yúhun raá xuta xi kjuanima tí'ajin. At'aha títsjá nga'yúnná Ntiana, kui nga kamahaná k'uai nga'yúhun raá xuta.

⁵Xi nkú ts'ín nkjin kjuanima tíbitjajín ngat'aha Cristo, b'a ta ts'ín tse nga'yún xi tísakújinni Cristo. ⁶Tu xi sakú nga'yún níhinuu ko tu xi k'uankihinu, kui nga tíbitjajíhinni kjuanima. Ko nk'ie nga tí'bai nga'yúnni, tí'bai nga'yúnni tu xi sakú nga'yúhunnuu. Kui nga'yúun xi kuasinkonuu tu xi n'e chúkjuanu nk'ie nga níbanenuu kju'a'un xi tíbitjajín. ⁷Yaj xi nkú ts'ín tjyanuu. Kui niu xi tíma 'yún tak'uin. At'aha yai nga nkuhú bitjajíaán kju'a'un ko b'a ta ts'ín sakú nga'yúnná.

⁸Jun já nts'e, najmi mjeni tsa k'úé'mai kjuanima xi tsitjajín ante Asia. Tu xí tsehé ni xi kamat'ain nga ta santaha najmi ta tíchúkjuahani niu. “Ja najmi ta kuitjunkihiná xu'bi”, tsixín. ⁹B'a kamaní xi nkú mahá já xi n'ek'ien. Tungá b'ahá kamaní tu xi najmi jin suba kama 'yún tak'uhunni yjoni. B'a ní kama tu xi Ntiana

^a 1:1 “Xi kis'exá” tsuhu ra “nda postru” ko a ra “já postru”.

kama 'yún tak'uhunni. Kui xi ts'ínkj'áiyaha xuta k'ien. ¹⁰Ntíaná kits'ínk'ankini nga ja ma kuayá ní ko behe tak'uin nga tu nku ts'ínk'ankihini. Tu nkú b'ahá ts'ín.

¹¹Chubantjai sahani nk'ie nga chubakoo Ntíaná. At'aha tsa nkjin maha xi kuinchjantjaini nk'ie nga kuinchjako Ntíaná, ta nkjin kamaha xi tsjáha máb'achjłhi Ntíaná ngat'aha nga nda tít'sínkoni.

B'i ts'ín kitsúya Pablo mí kjuaha nga tu xujuhún kits'ínkjłhi ra xuta ninku Corinto

¹²Tsjo mani nk'ie nga chasei xi nkú ts'ín tintsuqai ko yai nk'ie nga naxu kin'e'i ajihinnuu ko ajihin ngayjee xuta. Najmi ch'a kich'anachajłhi. Nk'ie nga b'a kin'e'i ajinnuu, kjuandaha ní Ntíaná kitsjániyáni. Najmi xi nkú ts'ín tjñaha xuta kitsjániyáni. ¹³Nk'ie nga n'ekjłhi xujun, b'et'ajłhi ni xi kamankjinnuu nga n'eyo. Nda nkjún tjin tsa kamankjinyjenuu niu. ¹⁴Ja tímankjinnuu ichi nd'ai nga nistjin nga kj'uaí ngáha Nda Ntíaná Jesu tsjo kamanuu jin xi nkú ta ts'ín tsjo kamaní jun.

¹⁵Tu ngat'aha nga ja be nga b'i tíma ajinná, kui nga kama mjehena nga tjun kfnsehenuu tu xi sakúhunuu kjuanda nga jo niyá kfnsubek'úhunuu. ¹⁶Mjena kai nga tjun kj'ua ajinnuu nk'ie nga kfián ante Macedonia ko askahan ta kjúáisehé ngáhanuu nk'ie nga k'oóya ngáhana yo. B'a ts'ín kama kuisinkohonú nga ts'inndjuú ngáhana niyána xi tjejen ante Judea.

¹⁷Kui b'a maha, nk'ie b'a ts'ín y'endáhana, ¿a najmi kits'innkjın sisihın ra k'an? ¿A ra b'endána ni xi ts'ian xi nkú ts'ín b'enda xuta ni xi ts'ín, nga ta kuihi chubo “johon” ko tsa “najmi” tsu? ¹⁸Ntíaná xi be nga najmi ta kuihi chubo “johon” ko “najmi” bixłihın. ¹⁹At'aha ajinnuu an ko Silbano ko Timoteo y'enijmıi Jesucristo xi Ntłhi Ntíaná, ko kui xi najmi ta kuihi chubo “johon” ko “najmi” tıtsu. Kui ní xi “johon” tıtsuná. ²⁰At'aha ngayjee ni xi tsuya tıtjun Ntíaná nga ts'ın, kui xi bitjusun ajihin Cristo. Kui kjuaha ngat'aha Cristo “b'a kat'e” bixłihinná tu xi sakúhu ra kjuachánka Ntíaná.

²¹Ntíaná ts'ın nga jun ko jin ndjá binchajıán Cristo, kui xi j'ájinná. ²²Kikj'áts'ená nga y'ejñajın Espirituhu animaná. B'a ts'ın yahaná nga n'ekjłhiın ni xi tsjáná askahan.

²³Nginkun Ntíaná b'a tíxinnuu: Nk'ie nga najmi ngjisenuu nanki Corinto, najmi ngjia at'aha najmi mjena tsjanuu kjuaba. Kataya tsa najmi kjuaxı ni xi tíxian. ²⁴Najmi tın'e kjuayúhun ri xi nkú ts'ın s'ejinnuu Ntíaná, at'aha ja ndjá tincho. Tu sa ní tıbisinkoıhi tu xi s'ehenuu kjuatsjo.

2 Kui nga b'a kixihinna nga najmi kfnsenuu, tu xi najmi kjuaba k'uejñajihinnuu. ²At'aha tsa tsjanuu kjuaba, ¿yá xi ts'ın nga k'úe tsjo tsjona? ¿A najmi nku tutuhú jun xi kitsjanuu kjuaba n'oo nga k'úe tsjo tsjona?

³Kui nga kits'inntúhunu tu xi najmi sakúhuna kjuaba nk'ie nga kuichusehenuu. At'aha jun xi tǐhin nga k'uainú kjuatsjo. Kó behe k'an nga kjuatsjoná, kui xi ta kjuatsjonuu. ⁴At'aha ni xi y'et'ánuu nk'ie nga kits'inntúnuu, b'a ts'ín y'et'á at'aha tu xǐ bahá tǐhin animana kó tu xǐ nusihín tǐyahá kui chubó nga santaha ixǐ kikjǐntaná. Najmi kits'inntúnuu tsa tu xi k'úé babahanuu. Kits'inntú nínuu tu xi chahanu nga tu xǐ tǐhóna jun.

B'ǐ ts'ín kitsúya Pablo mí kjuaha nga tǐhin nga n'endyjat'ahá rá ndá xi najmi nda kits'íun

⁵Tsa tǐn xi kits'ín nga kik'ie babana, najmi tu nku an xi b'a kits'ínna. Nk'ie nga chasehe ráá, kó ní jun b'a ta kits'ínnuu. Nk'ie nga chasehe ráá tǐxian, b'a tǐxian tu xi najmi k'uatihǐ rá ni xi tǐxian. ⁶Nkjin maha xi tǐn ajinnuu xi ja kits'ínk'íechǐ ndá xi kits'ínk'íé babana. Najmi ta chúkjuahá rá. ⁷Tu sahá n'endyjat'ohoo ndo kó tjon nga'yúhuun tu xi najmi kjuaboo ts'ínkjet'ahá rá k'un. ⁸Kui nga tǐbankihínuu nga takúchǐ ngáha ruu ndo nga tjonuu.

⁹ǎ kits'inntúhunu? Kits'inntúnuu tu xi skuehena tsa kuinú'yá'énnú. ¹⁰Xi n'endyjat'ohoo kó ta an ts'inndyjat'ahá. Tsa ni xi tǐhin nga n'endyjat'a nku ni, ja kits'inndyjat'a. B'a kits'ian ngandanuu nginkun Cristo, ¹¹tu xi najmi tǐn xi nkú ts'ín tsungijihin yjoho ndanindoo. At'aha ja yaá xi nkú ts'ín ch'on ts'ín tǐyahá.

B'ǐ ts'ín kitsúya Pablo mí kjuaha nga najmi ts'andayahá rá nk'ie nga ngǐ nanki Troá

¹²Nk'ie nga tsichuk'ienijmǐá nanki Troá én nda tsuhú Cristo, ndaha tsa kitsǐántena Nda Ntǐaná nga k'uenijmǐá yo, ¹³tunga najmi kis'eya tsjo tsǐhó rá animana, at'aha najmi kisakúna nda nts'eé Tító yo. Kui nga “ja tǐfihina”, kixihin rá xuta xi tǐn yo kó ngǐa ante Macedonǐa.

B'ǐ ts'ín kitsúya Pablo nga Ntǐaná kits'ínchǐhen nga ngǐndjuko én nda tsuhú Cristo

¹⁴Máb'achǐhi rá Ntǐaná xi ts'ín nga tehente n'e nganakoǐ Cristo Jesu kó nga jǐn tǐts'ínchǐenni nga tǐb'éjǐna chǐi éhen. Kui éen xi nkú joyaha ni xi sinjǐe xi tǐf'ánta tu má xi tǐjéhén ni. ¹⁵Jǐn xi nkú joyaha ntahá chǐe sinjǐe xi Cristo ts'ínkjas'ehen Ntǐaná, xi tǐf'ánta ajihin xi tǐb'anki kó ajihin xi tǐndyja. ¹⁶Xi tǐndyjoǐ jǐe ngabaya tǐf'ántahá jǐn kó kui ntǐ tǐts'ínk'íehen. Tunga jǐe kjuatík'uhún tǐf'ántahá jǐn xi tǐb'anki kó tǐts'ínk'íentu tǐk'uhún ntǐ. ǎYá xi kamahá ts'ín xá xu'bi? ¹⁷Jǐn najmi b'a tǐn'eǐ xi nkú incha ts'ín xi tǐbaténa éhen Ntǐaná tu xi sakúhu rá ni. Ngayjehe ní animani b'enijmǐi Cristo. B'a n'eǐ nginkun Ntǐaná xi kitsǐá xáni.

**B'i ts'ín y'éjña chji Pablo mí nihi xi
y'aha ni xi y'énda Ntíaná nga tjuhun
ko ni tsetse xi y'énda nd'ai**

3 Nk'ie nga b'a túbixiín, ¿a jihín nda ts'ín tíchubantjái yjoni? ¿A ra machjéhénni xi nkúhu xuta xi kj'ai nku xujun xi nda ts'ín kuinchjantjaini tu xi jun n'ekjáíhinni? ¿Ko a ra machjéhénni tsa jun n'endo nku xujun tu xi ts'ínkjáiíhinni xuta xingisoo? **2** Jun ní xujun xi nda nchajantjaini, kui xi y'éjñajinni Cristo. Be ko ts'inya ngayjee xuta, **3** at'aha ya chji chjihí nga jun xi xujun xi kits'ínttu Cristo xi jin kin'ekjas'eín. Najmi kin'entú xi nkú ts'ín n'entú xujun. Espirituhu ní Ntíaná xi tijná tík'uun kin'entúkoho. Ko najmi ndjio kis'et'a éen. Ajin níná xi xutahá kis'et'a.

4 Cristo títs'ín nga ma k'uin nga b'a kuixiín nga b'a tjín ni xi túbixiín nginkun Ntíaná. **5** Najmi tjínni nga'yún kuenta ts'ajin subai, tsa b'a kuixiín nga ts'ajin ni xi mani n'eí. Ntia níná tsjání nga'yún nga n'eí ni xi n'eí. **6** Kui xi y'éndani tu xi kama n'exájihin ri ni tsetse xi Ntíaná y'énda nga nda ts'ínkoho xuta xi ts'e. Ni xi tsetse, najmi nku kjuatéxuma xi tjt'a niu. Ni xi títs'ín ní Espirituhu Ntíaná niu. At'aha ngabaya fikóná kjuatéxuma xi kis'et'oo, tunga Espirituhu Ntíaná ts'ínk'íéntu tík'unná bi.

7 Kis'ehe kjuachánka xá xi kis'ehe kjuatéxuma xi kis'et'a ndjio nga santaha xuta Israel xi kis'e nk'ie najmi kama tsase'a Moise tu ngat'aha kuachánka xi tibat'aijín ankjín, ndaha tsa najmi tse kamaha nga tsat'ai. Tsa kjuatéxuma xi kis'ehe xá nga ts'ínnijéhe ra xuta nga tjeheh ngabaya, tsa kui xi b'a nkjún ts'ín kis'ehe kjuachánka, **8** ¿a najmi 'yúhún nkjún ts'ín tjín saha kjuachánka ni xi ts'ín Espiritu?

9 Tsa kis'ehe kjuachánka xáha kjuatéxuma xi ts'ínnijéhe xuta, ¿a najmi 'yúhún tjín saha kjuachánka xáha én nda tsuhu Ntíaná xi ts'ín nga naxu tíma xuta nginkun Ntíaná? **10** At'aha kjuachánka xi kis'ejña nk'ie ja kindyja. B'a ts'ín mankjinná nga ch'achubakaá kjuachánka xi 'yún chánka sa xi tijná nd'ai. **11** Tsa kis'ehe kjuachánka ni xi najmi tse kamaha nga tsat'ai, ¿a najmi 'yúhún tjín saha kjuachánka ni xi najmi mahá feya?

12 At'aha yai nga b'a tjín ni xi s'ejinni, kui nga najmi tjín ni xi títs'ínkasín'yúhunní. **13** Najmi b'a n'eí xi nkú kits'ín Moise. Kui xi najyun y'é'makoho ankjín tu xi najmi skuéhe xuta Israel nd'íhi kjuachánka xu'bo, kjuachánka xi najmi tse kamaha nga tsat'ai. **14** Tunga kis'e jyhún kjuankjintak'uhun xuta xu'bo. Ko santaha nd'ai, nk'ie nga incha ts'inya ni xi y'éndakoho Ntíaná nk'ie, b'a ma tsa ta kuihi najyuan b'é'ma kjuankjintak'uhun. Najmi kje chjuxíhin najyun xi nkuhú Cristo mahá kjexín. **15** Santaha nistjin nd'ai, nk'ie nga incha ts'inya ni xi y'é't'a Moise, kji'ma sa kjuankjink'uhun.

¹⁶Tunga nk'ie nga s'ejihin xuta Nda Ntǐaná, chjuxǐhin najyuun.
¹⁷At'aha nkuhú Nda Ntǐaná kō Espiritu, kō má nga tǐjǎ Espirituhu Nda Ntǐaná ndǐqǐhi yjoho xuta. ¹⁸Kui b'a maha, ngatenteé najmi tǎ tǐj'maha ankǐán. Xi nkú ní ts'ín ma chjiya sénnistjinná nku chǐtsín, b'a ts'ín bakuchjáa kjuachánkaha Nda Ntǐaná. Tǐbichú maá xi nkú tǐjǎ kō xkǐ nǐstjin 'yún tǐsakú saná kjuachánkaha. B'a tǐts'ínkoná Nda Ntǐaná xi Espiritu.

B'ǐ ts'ín kitsúya Pablo xi nkú ts'ín y'énijmǐ

4 Kui nga najmi n'ekjehe rǐ tak'uin, at'aha Ntǐaná tsase nimanǐ nga kitsǐánǐ xá xu'bi. ²Najmi tǐjǎ ni xi kin'ei xi suba manǐ. Najmi chumi nihi n'e'mái. Najmi kjuamaña tǐn'echjéin kō najmi tǐn'ek'óntjaiyai éhen Ntǐaná. Tǐbixǐnya chji chji nǐ éhen Ntǐaná xi naxu tǐjǎ. B'a ts'ín nginkun Ntǐaná bakuchǐhi rǐ nkú k'uin ngayjee xuta xi je tǐjintuyá kjuankjintak'uhun. ³Tsa b'a ma tsa tǐjǎ 'ma sa én nda tsuhu Ntǐaná xi tǐb'enijmǐ, tu ajihin ní xuta xi ndyja tǐjǎ 'ma.

⁴At'aha ntǐa xi batéxumaha asunnteǐ kits'ín jyun kjuankjintak'uhun xuta xi najmi s'ejihin Ntǐaná tu xi najmi incha skuéhe nd'íu, tsa kamankjihin én nda tsu xi tǐtsuya kjuachánkaha Cristo. At'aha nk'ie nga chaseheé Cristo, Ntǐaná yaá. ⁵Najmi jin tǐb'enijmǐyahanǐ yjoni. Tǐb'enijmǐ nǐ nga Jesucristo xi Nda Ntǐaná maha. Ngandanuu tǐn'ei ni xi tǐn'ei at'aha tǐjǎajinnǐ kjuatjoho Jesu. ⁶At'aha Ntǐaná xi kitsǐá kjuá nga kuat'ai nd'íu má jyuun, kui xi tǎ kits'ínkat'aijǐnná tu xi b'a ts'ín chahaná kjuachánkaha Ntǐaná xi tǐbat'ai ankǐin Jesucristo.

B'ǐ ts'ín kitsúya Pablo ni xi j'ajin

⁷Kik'ainǐ kjuanchiná xu'bi, tunga b'ahá joya jin xi nkú joyaha ndjǐ ninte xi má nga tǐjǎyaya kjuanchinóo. B'a kama tu xi s'ejǎ chjǐhi nga Ntǐaná ts'e nga'yún chánkoō kō najmi jin ts'ajin. ⁸Nkjin tǐkjá maha kjuanimǎ xi tǐyai, tunga tǐsakú niyáhánǐ. Kjintahani, tunga najmi tǐfet'ahá rǎ k'uin. ⁹Tǐjǎ xi yjanki unkienǐ, tunga najmi tǐts'ín nga mahánǐ Ntǐaná. Tǐjǎ xi 'yún tǐts'ín'unni, tunga najmi tǐts'ǐhin nga tǐbayai.

¹⁰Tu má xi tǐjén ni nga tǐbankǐin, tǎ kuihi kjuanimǎ tibitjǐin xi nkúhu xi j'ajin Jesu nga k'ien, tu xi b'a ts'ín tǎ sakúchjǐhi ajinnǐ nga Jesu xi tǐjǎ tǐk'un. ¹¹At'aha jin xi tǐntsuba tǐk'uin, tehente tǐntsubajǐin ngabayoo tu ngat'aha Jesu, tu xi b'a ts'ín tǎ sakúchjǐhi nga tǐjǎ tǐk'un Jesu ajihin yjonintenǐ, yjoninte xi tǐjǐhin nga kuayá ndyjun nkini. ¹²B'a ts'ín jin xi tǐbayahanǐ kō jun tǐbintsuba tǐk'un.

¹³B'ǐ ts'ín tǐj't'a éhen Ntǐaná: "Kis'ejinna, kui nga kinchahana." Kō jin b'a tǎ ts'ín tǐjintuyánǐ. Tǎ s'ejinnǐ, kui nga tǎ chubahanǐ.

¹⁴At'aha yaá nga Ntǐaná xi kits'ínkjǐáya ngáha rǎ Nda Ntǐaná Jesu

ngabayoo, kui xi ta ts'ínkj'áiyakoná Jesu ko ts'ínkincháná nginkun. ¹⁵Ngandanuu ngayjee ni xu'bi, tu xi nkjin xuta tsjáha ra máb'achjǎhi Ntíaná tu ngat'aha kjuanda xi tǐncha sakúhu. B'a ts'ín tís'ejña chjiji kjuachánkaha Ntíaná.

¹⁶Kui nga najmi n'ekjehe ri tak'uin. Ndaha tsa tífenki nga'yúhun yjoninteni, tunga xki nǐstjihín tísakú nga'yúhun animani. ¹⁷Ichí ko kutjuhú f'a kjuanimá xi tíyaá nd'ai, tunga kuihí niu xi ts'ín nga nku kjuachánka xi tǐña sín ko xi nda ts'ati sa sakúná. ¹⁸Najmi ni xi tíyaá n'esihín. Ni xi najmi tíya nínáá kjintaháná. At'aha ni xi ma chji tu tífahá, tunga ni xi najmi ma chji s'ejña sín.

B'ǐ ts'ín tsakúya Pablo nk'ie nga yjoninte tsetse ch'áá

5 At'aha yjonintená, kui xi nkú joyaha nku ni'ya najyunte xi tintsúbyaá ei asunnteǐ. Ko nk'ie nga kuatsún ni'ya najyuntee, yaá nga ndjiojmi ján ch'áá nku ni'ya xi 'yún nda xi tsjáná Ntíaná, xi najmi xuta kits'ínnda ko xi najmi maha batsun. ²Un tímaná nk'ie nga tintsúbaá ei. Mangimjená n'ekj'áihín ni'ya xi k'uainá ndjiojmi ján. Kui xi nkú joyaha tsa najyun tsetse kamaná nga ndyjaá. ³B'a ts'ín ndaha tsa chjúxiná ni'ya najyunte xi kich'aá nd'ai, najmi kisti chaná.

⁴At'aha nk'ie nga kich'a saá ni'ya najyunte xu'bi xi yjonintená, xí f'áítse'uhúnná nga najmi ta chúkjuahaná. Nk'ie nga najmi mjená ch'áá yjoninte xi kich'aá nd'ai, najmi tsuhu ra tsa najmi mjená yjoninte. Ni xi mje nínáá, nga ch'áá yjoninte tsetse tu xi b'a ts'ín ni xi tǐña tǐk'uun k'úejñaha ngajoho ni xi maha 'me. ⁵Kui ngat'oo kits'ínndahaná Ntíaná ko kitsjáná Espirituhu, tu xi cha kixihíná nga n'ekj'áihín ni xi tsjáná askahan.

⁶Kui nga tehente ndjá tinchahaná ko yaá nk'ie nga tintsúbajin saá yjonintee, tintsúba t'axíhín Nda Ntíaná. ⁷Tinimaá tu ngat'aha xi s'ejinná, najmi ngat'aha ni xi tíyaá. ⁸Ndjá tincháá ko mangimjená nga tu sahá k'úejña t'axiáán yjoninte xi kich'aá nd'ai nga kuintsúbakáá Nda Ntíaná.

⁹Kui nga tu nkú mjehéná nga n'eé ni xi tsjoho Nda Ntíaná, tsa ni xi tintsúbajin saá yjoninte xu'bi ko tsa ja kin'ekj'áiyáá. ¹⁰At'aha ngatenteé tjihin nga kuicháá nginkun Cristo nga kuasehe ni xi kin'eé, tu xi n'ekj'áihín raá ni xi kanéná nga nkúnkáá, ni xi kin'eé nga tintsúbajin yjonintená ei asunnteǐ, tsa nda ko tsa najmi nda kin'eé.

B'ǐ ts'ín tsakúya Pablo ni xi kits'ín Cristo ngandaná

¹¹Kui b'a maha, at'aha yankjúin Nda Ntíaná, kui nga t'imiya sisihín ri xuta nga ta s'ejihín. Ntíaná be xi nkú ts'ín tjíyani ko mjena nga ko ta jun xi nda animanuu choo xi nkú ts'ín tjíyani. ¹²Najmi ta tǐchubantjái ngáhanǐ yjonǐ, tsa tu xi jun n'ekj'áihini. Tu sa ní

tí'baĩntei nga jun tsjo tímanuu jin. B'a ts'ín kama n'ek'óyaha ruu xi chubá tsjohó maha xi nkú ts'ín tíya, xi najmi nusihin xi nkú ts'ín tjíyaha.

¹³At'aha tsa jin xi lukui tsu xuta, luku ní at'aha xáha Ntíaná tǐn'eǐ. Tunga ngandanuu, kui nga n'esisihinni ni xi n'eǐ. ¹⁴At'aha kjuatjohó Cristo tǐjñajinni kó tibatéxumani. Behe tak'uin nga nkuhú maha xi k'ien ngandaha ngatentee xuta, kó kui nga k'iehen ngatentee xuta. ¹⁵K'ien Cristo ngandaha ngatentee xuta, tu xi xi tjǐntu tǐk'uhun ja najmi ta kuenta ts'e suba k'úéntu tǐk'uhun. K'úéntu ní tu xi ts'ǐihin ni xi tsjohó Cristo. Kui xi k'ien ngandaha xuta kó j'áíya ngáha ra.

¹⁶Kui nga najmi ta chasehe ri xuta xi nkú ts'ín basehe xinkjin xuta. Ndaha tsa nk'ie b'a ta ts'ín kichasehi Cristo, tunga nd'ai najmi b'a ta ts'ín chasehe ri. ¹⁷Kui nga xi nkuhú kamako Cristo, kui xi xuta tsetse ngáha. Ja j'a ni chóo. Ja j'ai ni xi tsetse.

¹⁸Ngayjee ni xu'bi Ntíaná nibáha ra. Cristo kits'ínchjén nga tsichuk'un ngáha raá Ntíaná. Kó jin kitsjá xáni nga k'úénijmíhi xuta nga ja ma bichúk'un ngáha ra. ¹⁹Tsuhu ra ni nga Ntíaná kits'ínchjén Cristo nga kama kuichúk'un ngáha ra xuta xi tǐjñ ngayjee asuntee, nga najmi ts'ǐinsihin jéhe. Jin kitsjáni nga k'úénijmíi nga ja ma bichúk'un ngáha raá Ntíaná.

²⁰Jin xi y'éxani Cristo nga kuixínyai éhen. Kui nga xi nkúhu tsa Ntíaná tǐnchjakonuu nk'ie nga tǐchubakoihi. Ngajohó Cristo b'a tǐ'míhi nga t'endakoo Ntíaná. ²¹Cristo najmi kis'ehe ngatitsun, tunga tsasehé ra Ntíaná xi nkúhu tsa ngatitsun kis'ehe. Ngandaná b'a kits'ǐhin Ntíaná, tu xi tu ngat'aha Cristo naxu kamahaná nginkun.

6 Kui nga tǐbinchihi ri jin xi tǐn'exát'aihi Ntíaná nga najmi tu tohón manuu kjuandaha Ntíaná. ²At'aha b'ǐ tǐtsu éhen Ntíaná:

Nda chubá tsasinjúhu,

tsásinkoho nǐstjin nga kits'ink'ankia xuta.

B'a tǐxinnuu nga nd'ai ja kich'aá chubaha Ntíaná. Ja tinchajián nǐstjin nga tǐts'ink'anki xuta.

B'ǐ ts'ín kitsúya Pablo ni xi incha j'ajin tu ngat'aha xáha

³Ndaha nku najmi tǐn'endyjajihin tsa tu xi ndyjaha. B'a tǐn'eǐ tu xi najmi ch'on ts'ín chubayanéhe xá xi tǐn'eǐ. ⁴Tu sa ní ajihin ngayjee ni xi n'eǐ bakúchji nga Ntíaná tǐn'exát'aihi. Tǐn'e chúkjuai nkjin tǐkjá kjuá'un kó kjuanima xi tíyai kó kjuaba xi tǐsakúni. ⁵Tǐs'eni, nubayá tǐn'ekjas'enni, kó tíma ñjakúneni xuta nga tǐfi kontrani. Xá ndjá tǐn'eǐ, najmi tǐsuntuféi, kó kjintá tíyai.

⁶Naxu tǐbankínkoi yjoni kó mankjinni ni xi najmi chubá mankjina. Tǐjnni kjuatsenta kó n'etjóihi xuta. Tǐjñajinni Espirituhu Ntíaná kó tǐjñajinni kjuatjo xi nda. ⁷Én xi b'a tǐjñ tǐchubai kó

nga'yúhún Ntíaná tǵǵajinni. Naxu tinchaj nginkun Ntíaná, kui xi n'echjéin nga binsinkoi yjoni.

⁸Tǵǵin nga yankjúnni ko tǵǵin nga najmi yankjúnni. Tǵǵin nga nda ts'ín chubantǵǵáini ko tǵǵin nga ch'on ts'ín chubantǵǵáini. Já tsank'a n'e mani, ndaha tsa én xi naxu tǵchubai. ⁹Xuta xi najmi ch'a xi behe n'e mani, ndaha tsa ya sisinni. Xuta xi ja tǵme n'e mani, ndaha tsa tintsuba tǵk'un sai. Tǵbaini kjuanima, tunga najmi tǵbaya ní. ¹⁰Tintsubai xi nkúhu tsa kjuaba tǵinni, tunga tehentehé tǵin tsjo tsjoni. Tintsubai xi nkúhu xuta xi x'an, tunga nkjihín maha xi ja kin'e nchinái. Tintsubai xi nkúhu xi najmi chumi nihi xi tǵhín, tunga tǵhínni ni.

¹¹Jun xuta Corinto, jin ja kuachubako kixi kixihi. Tǵmiyaihi ni xi tǵǵajin animani. ¹²Mje níni jun, tunga jun najmi b'a ts'ín mjenuu jin. ¹³Kui nga tǵchjakohonu xi nkúhu tsa ntǵn jun. B'a tǵ n'oo xi nkú nga tǵn'ei. B'a tǵ ts'ín takúni ni xi tǵǵajin animanu.

**B'ǵ ts'ín kitsúya Pablo nga najmi tǵhín
nga nkuhú ts'ín mako johu xi s'ejihín
Ntíaná ko xi najmi s'ejihín**

¹⁴Najmi tǵ nkuhú n'e makoo yjonuu xuta xi najmi s'ejihín Ntíaná nga ts'ínkonuu ni xi ts'e. At'ahq, ǵa nkuhú mako xinkjín ni xi jee ko ni xi ch'onk'uun? ǵA mahá má ndzjeen ko má jyuun b'atjijihín xinkjín? ¹⁵ǵA mahá nda nchjako Cristo ndanindoo? ǵMí ni xi nkuhú incha y'a xi s'ejihín Ntíaná ko xi najmi s'ejihín?

¹⁶ǵA kamahá ninkuhu Ntíaná ts'ínkjáihín ntǵ xi ntsja xuta ts'ínnda? At'ahq ná xi ninkuhu Ntíaná xi tǵǵa tǵk'uun. B'ǵ kitsú Ntíaná nk'ie:

Kúateǵajihín ko kjuatsú'bajihín xuta xu'bo.
An xi kama Ntǵahq ko kui xi kama xutana.

¹⁷Kui nga b'a tǵ kitsú saha Ntíaná:

Tǵtǵjúhún xuto, tankín t'axíun.
Najmi tǵ n'ekoo ni xi si nginkán,
ko b'a ts'ín an nda ts'ín ts'inkjáinnuu.

¹⁸An xi kama Na'minuu ko jun xi kamo ntǵn.

B'a tǵtsu Ntíaná xi tǵhín nga'yún.

7 Kui b'a maha, jun xi tjona, ná ts'ańáa ni xi kitsúya tǵtǵun Ntíaná nga tsjáha xuta xi ts'e. Kui nga n'e jehená yjoná nginkun Ntíaná nga n'e t'axíaán ngayjee ni xi ts'ínsi yjonintená ko animaná. Katuma je kikjían nginkun Ntíaná nk'ie nga chǵankjáán.

**B'ǵ ts'ín kitsúya Pablo nga tsjo tímaha ni
xi nda ts'ín j'ajin xuta ninku Corinto**

²Tjennteni ajin animanu. Ndaha nku najmi ch'on kin'eihí. Ndaha nku najmi kin'e'uihín. Ndaha nku najmi kich'anqchahí. ³Najmi

b'a tǐxinnu tsa tu xi s'entahanu. At'aha xi nkú nga ja kixinnu, jun xi tintsubajiun animani, tu xi nkuhú ch'ahaná xinkíá ndaha tsa kuǐntsubaá ko ndaha tsa kuayáá. ⁴Ma k'an nchjako kixi kixinnu ko tsjo mana jun. Ajihin ngayjee kjuanima xi tíyai, 'yún tísakúna nga'yún ko títsejǐhinna kjuatsjo.

⁵Nk'ie nga jái ante Macedonia, ndahachí najmi kin'ekj'áfyai. Tu sa ní kjuasti kisakúni tu má xi tjehén ni. Incha kíkjánko xinkjín xuta xi tjǐntundáini ko tsinkjunyai. ⁶Tunga Ntianá xi tsjá nga'yúhun xuta xi tjǐhin kjuaba, kui xi kitsjá nga'yúnni nga kits'ín nibáseni Tito. ⁷Najmi tu nku nga kiyai Tito nga kisakú nga'yúnni. Ta kisakú nga'yún níni nga kitsúyani xi nkú ts'ín kisakú nga'yúhun ajinnu. Kitsúyani nga 'yún mjenuu cha ngáhani ko nga nusin tjǐntuyánuu ko nga kjintahanu an. Kui niu xi kits'ín nga 'yún kis'e sana kjuatsjo.

⁸Ndaha tsa kits'ínk'íé babanu xujun xi kits'ínkjǐnuu, tunga najmi ta kjintahana nd'ai. Kjuaxi nga kis'entana nga tjuhun, at'aha kamankjinna nga kik'ie babanu kutju ngat'aha xujun xi kits'ínkjǐnuu. ⁹Tunga nd'ai tsjo tímana, najmi tu ngat'aha nga kik'ie babanu, tu ngat'aha ní nga kui kjuaboó kits'ín nga tsankinchj'a ngáha ruu animanu. Kik'ie babanu xi nkú ts'ín sasíhin Ntianá. Kui nga najmi chumi ni ch'onk'uhun xi kin'ehe ri. ¹⁰At'aha kjuaba xi nibáha ra Ntianá ts'ín nga bankíh'aha raá animaná. Kui niu xi ts'ín nga b'ankíá. Kui nga najmi tjín xi nkú ts'ín un kamaha tak'aán nga kui kjuaboó nǐbanehená. B'a tǐxian at'aha kjuaba xi tsjáná asuntee, kui xi ts'ínk'iená.

¹¹Chasoo ni xi kits'ínkonu kjuaba xi kits'ín nibánu Ntianá. Tu xí kj'áihí ts'ín kis'eyanu. Nku tutuhú nga b'a kamanu, kiyo nga najmi chumi nihi tjenna. Santaha kichubantjǐnú. Kama stinu ko tsinkjun ngat'aha ni xi kama kai. Kama mjenuu nga chanú ko kik'oho xi nkú ts'ín tjehén ra nda xi ch'on kits'ín. Nk'ie nga b'i nkjún kama, tsakuchjú nga najmi ko jun y'ahanu ni ch'on tjín xi kamoo.

¹²Kui nga ndaha tsa kits'ínkjǐhinu xujun xu'bo, najmi b'a kits'ian tu ngat'aha xi ch'on kits'ín ko ta ndaha ngat'aha xi ch'on kin'ehe. B'a ní kits'ian tu xi chaha nginkun Ntianá nga kjintahanu jin. ¹³Ni xi kamoo kitsjá nga'yúnni.

Ko najmi tu nku ni xu'bi xi kitsjá nga'yúnni. Ta tu xí tsjo ní kamaní nga kiyai nga tu xí tsjohó tjǐhin Tito at'aha kisakú nga'yúhun nga y'eǐnjajinnu. ¹⁴Ja ní b'a kixihin Tito nga tsjo mana jun, ko b'a tjín ni xi kixian. Najmi tíya tsank'ána. Xi nkú ts'ín kjuaxi ngayjee ni xi tsixíihin, b'a ta ts'ín kjuaxi ni xi kik'ihin Tito nga tsjo maní jun. ¹⁵Tito 'yún tjo ts'atíhi jun nd'ai, at'aha f'áitsjehen xi nkú ts'ín ngatentoo kinu'yá'óhoon ko xi nkú ts'ín nda kin'ekj'óhoon ko kiyankjún. ¹⁶Tsjo mana, at'aha be nga ma ma 'yún tak'unnu.

**B'i ts'in kitsúya Pablo nga tjihin nga kamakúhu
toon chje xuta ninku xi tjin ante Judea**

8 Ko nd'ai, já nts'e, mjeni nga choo xi nkú ts'in Ntíaná títsjáha kjuandaha xuta ninku xi tjin ante Macedonia. ²Ndaha tsa ndjá kjuanimá xi tíncha satéjin nga tíchjut'ayák'un, tunga tsjohó tíntuhú. Ko ndaha tsa x'an nkjún, tunga incha kits'ínsuhún toon chje xi nkú joyaha tsa nchiná.

³Be nga ngayjehe k'un incha kitsjá. Xi nkú tjin kamaha kitsjá, ko santaha y'ésun saha nga kitsjá. ⁴Yún tsankini nga kjuanteihí nga sakút'aha kjuatsjo xu'bi tu xi kuasinkoho xuta xi s'ejihin Ntíaná xi tíntu ante Judea. ⁵Ko najmi tu nku ni xi tsixín nga ts'ín incha kits'ín. At'aha tíjún tíjún incha kitsjáha yjoho nga incha tsjénki Ntíaná, ko ta incha kitsjáha yjoho nga kamakoni xi nkú ts'in mjehe Ntíaná.

⁶Kui nga tsinchihí ri Tito nga ts'ínndjuúhu xá nda xi kik'atuts'ihin ra ajinnuu, nga k'uénda chje nda xi tín'esún. ⁷Yún nda n'o ngayjee ni xi n'o. S'ejinnuu Ntíaná. Chubanijmíyahanu ni xi ts'e Ntíaná. Mankjinnuu éhen Ntíaná. Tjindannuu yjonuu nga kuisinkoo xuta xi k'ái. Tjonuu jin. Kui nga xi nkú ts'in tehente nda n'ehenu ni xi n'o, b'a ta ts'in nd'ai nda n'esún ngó toon chje xu'bi.

⁸Najmi b'a tíxian tsa tjihin kjua'yún nga b'a ta n'oo. Ni xi mje nína, nga choo ni nda xi tíncha ts'in já nts'eé xi k'oo tu xi b'a ta ts'in kuakúchjihinu nga ta ngayjee animannuu tínibáha kjuatjonuu. ⁹Ja yo kjuanda xi y'a Ndá Ntíaná Jesucristo nga j'ai, nga ndaha tsa tu xí nk'ahá tjen tunga ts'asje x'ahán yjoho ngandanuu, tu xi ajihin kjuax'an xi kis'ehe ra kisakúhunuu kjuanchiná.

¹⁰Tsjanuu nku kjuatéxuma at'aha kjennuu niyá nga choo kui nii. Nk'ie nú jun tjun kama mjennuu nga n'esún toon chje ko jun tjun kin'esún. ¹¹Kui nga n'endjuúhunu nd'ai ni xi kich'atuts'ihinruu. Xi nkú ts'in ngayjehe k'un kama mjennuu nga b'a n'oo, b'a ts'in ngayjehe k'un xi nkú ts'in tísakúnuu tjon niu nd'ai. ¹²At'aha tsa ngayjee animaná tí'baá, ko tsa tí'baá xi nkú tjin tísakúná, Ntíaná ts'ínkjáihin ni xi tí'baá. Najmi tíbankiná ni xi najmi tjinná.

¹³Najmi b'a tíxian tsa jun tjihin nga kuitjájun kjuanimá ko tu sa kj'áihí ngá xi nda ts'in k'úentu. Ni xi nda ní tjin nga nkuhú nga nda ts'in kuintsuboo. ¹⁴Nd'ai tjinnuu ko kama k'uoho ni xi ndyjat'aha xuta xu'bo, ko k'ái nistjin ngáha kui s'ehe ni xi ndyjat'anuu. B'a ts'in ta kama tsjánuu. Nku chubahá s'enuu. ¹⁵Kuitjusun xi nkú ts'in tí'ta éhen Ntíaná: "Najmi ts'anki kamaha xi 'yún tse j'áya ko najmi kindyjat'aha xi chuba j'áya."

B'i ts'in kitsúya Pablo yá xi ngjuaiiko toon chje

¹⁶Tsjaha máb'achjhi Ntíaná at'aha kitsjáha Tito nga ta ngjuántaha ra yjoho jun xi nkú ta ts'in kjintahana an. ¹⁷Kits'ínj'o nga

ts'íntjusun ni xi an tsankihǐ kō ngayjehe k'un tífisenūu. Ja b'ǎ tǐtsu koyaha animaha.

¹⁸Kō ta tǐn'ekjǐkōi Tito nda nts'eé xi nda ts'ín nchjayanehe ngayjee xuta nǐnku, at'aha kixǐ b'énǐjmǐ én nda tsuhǐ Ntǐaná ndo. ¹⁹Kō najmi tu nku nda ts'ín chubanǐjmǐyaha ndo. Ta y'ét'a xáha xuta nǐnku nga kui xi ngjuǎikōni nga kuankǐnkōi toon chje. B'ǐ nda tǐn'eǐ kō b'ǎ ts'ín tǐn'etsjoho rǎ Nda Ntǐaná kō tǐb'ejǐna chjǐi nga mjenǐ kuǐsǐnkōi xuta. ²⁰Najmi mjenǐ tsa tǐjǐn xi kuinchjayanenǐ ngat'aha xi nkú ts'ín tǐncha tǐtjuǐhǐn toon chje chánga xi tǐmakú. ²¹Kui nga nda nda tǐchasehe rǐ xi nkú ts'ín kixǐ tǐbankǐnkōi ni xi tǐn'eǐ nginkun Nda Ntǐaná kō ta nginkun xuta.

²²Kō ta tǐn'ekjǐkōi já xu'bǐ kj'ǎi nda nts'eé xi ja nkjin nǐyǎ tsakúchjǐnǐ nga nda fǐkō xáha. 'Yún mjehe kuǎsǐnkōnūu, at'aha 'yún sasǐhǐn jun. ²³Kō máha Tito, ta kui xáha xi tǐts'ín xi nkúhu an, nga ta tǐbasǐnkōnūu. Kō já nts'eé xingisoo xi tǐenko, xuta nǐnku kits'ǐnkjǐhǐ. Kui jóo ta ts'ín nga yankjún Cristo tu ngat'aha xá xi ts'ín. ²⁴Kui b'ǎ maha, nda ts'ín n'ekjǎhǐn ruu jóo tu xi skuehe ngayjee xuta nǐnku xi nkú tǐjǐn kjuǎtjonūu kō mǐ kjuǎha nga tsjo mahǎnǐ jun.

B'ǐ ts'ín y'énda Pablō xi nkú ts'ín s'ekú toon chje xi kamakú

9 Ta ndaha najmi machjéhen tsa kuet'ánūu nga toon chje tǐmasúhǐn xuta xi Ntǐaná kikj'áts'ehe xi tǐjǐntu ante Judea.

²At'aha be nga nda animanūu. Xǐ tsjohó tǐmana nk'ie nga kixinyaha kui nǐi xuta xi tǐjǐn ante Macedonia. B'ǎ kixihǐn nga jun xi tǐntsuboo ante Akaya nk'ie nú kjin tǐntsubǎ ndahanu nga k'uo toon. Nk'ie nga kint'é xuta Macedonia kui nǐi, nkjin xi ta kixinchá tsjoho nga ta ts'ǐinsun toon.

³Tunga tǐts'ǐnkjǐsehénūu já nts'eé xu'bǐ tu xi najmi tu a éhén kamaha ni xi kixihǐn jóo nk'ie nga b'ǎ kixian nga tsjo mana jun ngat'aha ni xi tǐn'o. Tǐfǐ jóo yō tu xi kuǎsǐnkōhōnūu nga k'úékú toon xi k'uo. B'ǎ ts'ín kamaha ni xi kixihǐn. ⁴At'aha tsa kuankǐnkōi yō k'uo xuta Macedonia, kō tsa ǎs'ǎihǐ incha skue nga najmi kjee tǐjkúnūu toon chje, kama subanǐ. At'aha ja tu xǐ tǐma 'yún k'un nǐi ni xi tsixǐn. Kō jun ta kama subanūu. ⁵Kui nga b'ǎ kixihinna nga tu sahǎ b'ǎ xǐhǐn já nts'eé nga tǐjun ngjuǎisehénūu tu xi k'uéndakōhōnūu toon chje xi tsixǐnya tǐtǐjun nga k'uo. B'ǎ ts'ian tu xi b'ǎ ts'ín s'ejǐna ndaha nku toon chje xi ngayjee animǎ tǐ'bai, najmi tu kjuǎ'yúhún tǐ'bai.

⁶N'ekj'átsjon ni xu'bǐ. Xi chuba ni xi b'éntǐje, kui xi chuba chan kjesǐntǐen, kō xi tse ni xi b'éntǐje, kui xi tse chan kjesǐntǐen. ⁷Nga nkúnkú tǐjon xi nkú tǐjǐn nibáha rǎ animanūu. Najmi tu un katuma k'un ni xi k'uo nga k'uo, kō ta ndaha najmi tu kjuǎ'yún 'boo. At'aha Ntǐaná tǐjohō xi tsjo tǐhǐn nga tsjǎ ni xi tsjǎ. ⁸Tǐhǐn nga'yún Ntǐaná

nga tu ni xí tsjáhnúu ngayje tǐkjá kjuanda, tu xi tu nkjéhé nihi najmi chumi nihi xi ndyjat'ahanuu ko b'a ts'ín kama n'ehenu ngayjee ni xi nda. ⁹Xi nkú ts'ín tǐjt'a éhen Ntǐaná nga b'ǐ tǐtsu:

Kits'ínndzjo ni xi tǐjǐh,̄

xuta x'an kitsjáha.

Tu nkjéhé ni nga naxu ts'ín.

¹⁰Ntǐaná xi tsjá xujmá xi s'entje ko tsjá nichine, kui xi tse ni xi tsjánuu tu xi ta kama kuisinkohonuu xuta. Ts'íin nga 'yún tse s'enuu ko nga xúbáya ni nda xi tǐn'o. ¹¹Nkjin tǐkjá kjuanchiná s'enuu tu xi ngayjehe k'un kama kuisinkoo xuta. Ko máha ni xi n'e nibákoni, kui xi ts'íin nga já nts'eé tsjáha máb'achjǐhi Ntǐaná.

¹²Nk'ie nga tǐbisinkoo xuta xi Ntǐaná kǐkj'áts'e, tǐ'bohó ni xi machjéhen ko kui nga nkjin xi tǐtsjáha ra máb'achjǐhi Ntǐaná. ¹³Nk'ie nga skué ni xi tǐn'o, incha ts'íintsjohó Ntǐaná, at'aha tǐnu'yá'óhóon én nda tsuhú Cristo ko at'aha ngayje animanuu tǐbisinkoo, ko najmi tu kui, kj'aí sa xuta. ¹⁴Ko nk'ie nga incha kuinchjako Ntǐaná, kuinchjantjainuu at'aha tjohó jun. Incha skué nga tu xí tsehé kjuandaha Ntǐaná kitsjánuu. ¹⁵¡Máb'achjǐhi ra Ntǐaná ngat'aha ni xi tsjáná! ¡Najmi tǐjinná én xi kuixinyahaná xi nkú ts'ín chánka ni xi tu kitsjáhná!

B'ǐ ts'ín y'éjǎa chji Pablo nga tsjo mahá xá xi Ntǐaná kitsjáha

10 Nginkun Cristo xi tjohó ko xi nda ts'ínko xuta, an Pablo tǐbankinuu nku ni. B'a tǐxian at'aha tǐjǐn xi b'a tsu nga najmi nda nkjún tǐjǐn nk'ie nga tǐjǐnajinnuu ko nga ndjá nchja nk'ie nga kjin tǐjǐnanuu. ²Tǐbankinuu nga najmi tu n'o nga ndjá kuinchjakonuu nk'ie nga kuichusenuu. At'aha tǐjǐnkuhu k'an nga ndjá kuinchjaka xi b'a mahá nga b'a ts'ín tintsúbai xi nkú ts'ín nkaha xuta asunntej.

³Kjuaxi kǐjǐhin nga asunntej tintsúbai, tunga najmi b'ahá ts'ín tǐbixkjain xi nkú ts'ín kǐjǐn xuta asunntej. ⁴At'aha najmi asunntej ts'e ni xi tǐn'echjéin nga tǐbixkjain. Nga'yúhun ní Ntǐaná tǐn'echjéin, nga'yún xi mahá ts'ínkje nga'yúhun já kontra ko basinne'yún én xi nchja xi fi kontrani. ⁵Chjuxubai ngayjee nga'yún ch'onk'un xi b'échjaha xuta nga skué Ntǐaná, ko n'e nganqǐhi ngayjee ni ch'onk'un xi ts'innkjink'un xuta. B'a n'ej tu xi kuint'é'éhen ra Cristo. ⁶Tǐjǐndani yjoni nga n'ek'íechjǐi xi nkú ts'ín tjeheh ra xi najmi kuint'é'én, tunga tǐtjuhún tǐjǐhin nga jun tjun kuinú'yá'én sisinnú.

⁷Jun xi chase sunnk'ohoo ni xi tǐjǐn. Tsa tǐjǐn xi behe k'un nga Cristo yjanki, kui xi ta kats'ín kuenta nga ko ta jǐn yjankii Cristo xi nkúhu kui. ⁸Ndaha tsa nk'a b'asjé yjona ngat'aha xáni, tunga najmi subahá mana nga b'a ts'ian, at'aha Nda Ntǐaná kitsjá xáni. Kui xi mjehe nga n'ej nga saǐjin so ni xi ts'e Ntǐaná, najmi mjehe tsa n'ej nga ndyjoo.

⁹Najmi mjena tsa xujun xi títs'inkjǐnuu kuinchánkjǐnnuu. ¹⁰At'aha tjǐn xi b'a tsu nga ndjá rú kō kjan rú én xi b'et'ánuu, tunga nk'ie rú nga tíjǐnǎjinnuu najmi ndjá rú b'asjé yjona kō rú najmi chumi ni chjǐhi ra én xi nchja. ¹¹Tunga xi b'a títsuu kats'ín kuenta nga ni xi b'et'a xujun nga kjin tintsubaí, kui niu xi n'eí nk'ie nga kuintsujǐhǐn.

¹²Tjǐn xi nda ts'ín nchjanǐmjýaha yjoho. Tunga máha jǐn, najmi ma k'ujǐn tsa b'a bixǐn nga jǐn xi nkú joyaha já xu'bo, kō tsa ta nja n'e makoi yjoni jóo. Ta ndaha najmi be ni xi incha ts'ín jóo, at'aha ta kuihi xinkjǐn base chubayakoho ra yjoho kō incha base chubayaha xinkjǐn. ¹³Tunga máha jǐn, nku tutuhú ngat'aha xá xi kik'aini jǐn, kui niu xi chánka n'esjekohoni yjoni. Najmi bitjatǐhi chjintí xi y'ejǐnaha Ntǐaná xáni, xá xi tsichuk'únnuu santaha kō jun. ¹⁴Tsa najmi tsichuk'úhǐn kai, ja ra tíbitjatǐhi má tjehe ra xáni. Tunga kjuaxihí kjǐhǐn nga jǐn tjun tsichukoihi én nda tsuhu Cristo.

¹⁵Najmi tíf'a ts'ajǐn xá xi incha kits'ín kj'ái xutaha, tsa tu xi nk'a n'esjeheni yjoni. Tu sa ní tíchuyáhi nga xi nkú ts'ín 'yún s'ejin sanuu Ntǐaná, b'a ts'ín kama tse sa ajinnuu xáni, ¹⁶tu xi kama kuank'ínk'íénǐmjǐhǐn én nda tsuhu Cristo ajihǐn xuta xi kjin tjǐntu sa nga jun. At'aha najmi mjeni tsa n'e ts'ajǐn xá xi kits'ín kj'ái, tsa tu xi b'a ts'ín n'e chánkahani yjoni.

¹⁷Tsa tjǐn xi mjehe nk'a k'uasje yjoho, ngat'aha ní ni xi kits'ínkoho Ntǐaná, kui ní ngat'aha nga nk'a kat'asjehe yjoho. ¹⁸At'aha najmi xi nda ts'ín nchjayane suba yjoho, tsa kui xi nda n'ekjǐhǐn. Xi nda ní ts'ín nchjayanehe Ntǐaná, kui ní xi nda n'ekjǐhǐn.

B'í ts'ín kitsúya Pablo ni xi ts'ín já postru ts'ank'óo

11 N'echúkjuo ichí tsa kuinchajnu kuinchjat'a. Johon, n'e chúkjuanu. ²At'aha nginkun Ntǐaná nibáha ra xi nkú ts'ín tǐkunnuu. At'aha jun xi nkú joyaha takjǐn xi an kits'ínkjas'en nga kuixankō nku nda, kui xi Cristo. Kō mjena ts'ínkjas'ehe jun xi nkú joyaha nku takjǐn xunkú. ³Tunga tsankjunná tsa b'a kamat'on xi nkú nga kamat'ain Eva nk'ie nga kjuamañaha ye ts'anachakoho ra, tsa b'a ts'ínndyjajihǐn kjuankjintak'unnuu kō najmi ta ngayjehe k'un kō je tsjénkihi ruu Cristo.

⁴B'a tíxian at'aha nda ts'ín n'ekjohon já xi kj'ái én b'énǐmjǐnuu, kui xi najmi éhe Jesu xi jǐn y'enǐmjǐ. Jun xi ja kin'ekjohon Espirituhu Ntǐaná, ta n'ekjohon kj'ái xi najmi Espirituhu Ntǐaná. Jun xi ja kin'ekjohon én nda tsuhu Cristo, ta tǐn'ekjohon kj'ái én. ⁵Najmi ichí mana yjona nginkun já postru i xi tjǐn. ⁶Ndaha tsa najmi 'yún mana nchja nga nchja, tunga bená ni xi ts'e Ntǐaná. Ja ní tu xí tsakuchǐhí rǐ nga yai ni xi ts'e Ntǐaná.

⁷Nk'ie nga y'enǐmjǐnuu én nda tsuhu Ntǐaná, najmi j'achjǐnuu. B'a ts'ín ts'asjé nǐmakjuahana yjona kō jun ts'asjénk'anuu. ¿A

ngatitsuhún kits'ian nga b'a kits'innuu? ⁸Tsakj'a toon xi kitsjana kj'aj ninku tu xi kama ts'ihinna xana ajinnuu. ⁹Nk'ie nga tsatejñajinnuu ko nga kindyjat'ana tsa mí nihi, najmi kits'instinnuu. At'aha ni xi kindyjat'ana, já nts'eé xi nibáha ante Macedonia kitsjana. Najmi y'enénuu yjona ko tu nkú najmi k'uenéhénuu yjona. ¹⁰Kjuaxi nga éhen Cristo tññajinna ko kjuaxi nga ngúsuhun ante Akaya najmi kama s'ech'ónna kjuatsjo xi tñinna nk'ie nga najmi f'achjá nga b'enijmía én nda tsuhu Cristo. ¹¹¿Ahan? ¿A at'aha najmi tjona jun? Ntíaná be nga tjona jun.

¹²Tu nkú kfinndjukoná ni xi títs'ian. B'a ts'ín najmi tsjantéhe ra xi tñincha bangisjai niyáha nga xi nkúhu jin ts'ín ma yjoho, tsa tu xi b'a ts'ín nk'a k'uasjehe yjoho. ¹³At'aha já postru tsank'áhá jái. Xá xi incha ts'ín b'anachakoho ra xuta. Já postruhu Cristo ts'ín ma maña yjoho. ¹⁴Najmi ni tsetse ni xi tñincha ts'ín jóo. At'aha ndanindoo nku ntítsjehe Ntíaná ts'ín ma maña yjoho. ¹⁵Kui nga najmi ma nkjúhunná nga já xi ts'inxát'aha ra ndanindoo xuta xi ts'ín ni xi nda incha ts'ín ma maña yjoho. Tunga kuichúhú nistjin nga ts'ínkjáihin chjǎhi ni xi tñincha ts'ín.

B'i ts'ín kitsúya Pablo nga nkjin kjuanima j'ajin ngat'aha xáha

¹⁶B'ahá ta tíxin ngáhanuu. Ndaha nku najmi b'a tu katsú nga nchajnu nchjat'a. Tunga tsa jun xi b'a kuixiún, tu sa ní tjennténú nga kuinchjakonuu xi nkúhu nku xi nchajnu nchjat'a tu xi chánka k'uasjéhena ichí yjona. ¹⁷Nga ma k'an chánka k'uasjé yjona, najmi Nda Ntíaná tinibáha ra nga b'a tíxian. An ní suba chubá tñinchaná. ¹⁸Xihí nkjihín maha xi chánka incha maha yjoho ngat'aha xi nkú ts'ín, kui nga ko ta an chánka kamahana yjona. ¹⁹At'aha jun xi nkjink'un, kui nga nda ts'ín n'ekjáihin ruu xi nchajnu nchjat'a. ²⁰Santaha 'bainto nga xuta musu n'e manuu, nga ch'anachanuu, nga chju'ánuu ni xi ts'ajun, ko 'baintoho xi nk'a b'asjenuu yjoho ko xi incha m'ojinnuu.

²¹Jin bi najmi b'a ts'ín ndjá kin'ekjǎhi xi nkúhu já xu'bo. Xí tíma subahána nga b'a tíxian. Tsa tñin xi ma k'un nga tsjo maha ngat'a ts'e yáha kui, ta kama k'an b'a ta ts'ian, ndaha tsa tñinchanu tñinchat'a nga b'a tíxian. ²²¿A já hebreo niu? Ta nda hebreoná. ¿A ntje Israel tjeheh ra jóo? Ta ntje Israel tjehehenna. ¿A ntjehe Abraham jóo? Ta ntjehe Abraham an. ²³¿A kui xi tñincha ts'inxát'aha Cristo? An xi 'yún títs'inxát'a saha, ndaha tsa b'a ts'ín tñincha xi nkú ts'ín nchja xi nchajnu nchjat'a. An xi 'yún kits'inxá sa nga kui jóo. 'Yún nkjin niyá kin'ekjána nubayá. 'Yún nkjin niyá kis'ena. Ko nkjin niyá ja ma tsayaná kai. ²⁴Un niyá kingjana já k'aku xi tñin xuta judio kan tñion ñju niyá. Xi nkú ts'ín tñincha, b'a kits'ín. ²⁵Jan niyá tsich'onýána.

Nku niyá y'étjǎtsena ndjio jóo. Jan niyá ngjijintí yábarku xi tjíiya. Nku nǎstjen ko nku nǎstjin kitsjenb'ásan ntáchak'uun.

²⁶Yún nkjún jatsúu'ba tu má xi tje'hén ni. Nk'ie nga kits'ian niyá kitsankjan ni xi kamat'an ajin ntáje. Kitsankjan tsa já ndyjéé satéjian. Kitsankjan tsa nkú incha ts'ínna xi ta ntje judio tje'hen ra xi nkúhu an ko ta xuta xi najmi ntje judio tje'hen ra. Kitsankjan tsa nkú kamat'an ajin nantio ko ngijñóo ko ajin ntáchak'uun, ko ta ajihin xi já nts'eé ts'ín ma maña yjoho. ²⁷Tu xí nchjáhá ni xi kits'ian ko tse kjuanimá kikié. Tu xí nkjihín niyá najmi kikjafé. Kama bjona, kama xintána, ko tu xí nkjihín niyá tsátejña kjintía nga najmi chumi nihi xi kisakúna nga kjíne. J'ajian nch'án ko kindyjat'ána najyun.

²⁸Ndaha tsa b'a tímat'an, tunga ta kis'entahána ngayjee nǎnku xki nǎstjin. ²⁹Tsa tjín xi saté ch'in, ko ta an ma unna. Tsa tjín xi n'endyjajihin ni xi ts'e Ntíaná, tu xí kjahán mana.

³⁰Tsa ni xi machjé'hen ra nga chánka k'uasjéhena yjona, chánka ní k'uasjé yjona nga najmi tjínna nga'yún xi ts'an. ³¹Ntíaha ko Nǎ'mihi Ndá Ntíaná Jesucristo xi tjíhin nga n'etsjoho tu nkjéhé ni. Kui xi be nga najmi tǎb'anacha. ³²Nk'ie nga tsátejña nanki Damasco, kitsjá kjuá ndá títjun xi ts'ínxát'aha ndá rej Areta nga chúnnta ankjuaha nankiu tu xi chjúbénijéhena. ³³Tunga nkuhú nisin kichjujenkohona xjó xi tǎf'a tjindaihi nankiu. Ankjuank'a xi tjent'a xjóho nankiu kin'esjehena. B'a ts'ín tsankaha ra jóo.

B'i ts'ín kitsúya Pablo nga nga'yúhun Cristo tǎjñaha

12 Ndaha tsa najmi chumi ni chjǎhi ra nga chánka k'uasjé yjona, tunga tǎhín ni nga b'a ts'ian. Kui nga kuinchjhana ni xi kikié ko xi tsakúchjina Ndá Ntíaná. ²Be nku ndá xi s'ejihin Cristo xi kichjubéjihin sén nga ngji nk'a ján xi ma jahan. Ja tjíhin te ñju nú nga b'a kamoó. Tsa ngji yjonintehe ko tsa najmi ngji, najmi be. Ntíaná xi be. ³Be nga ndá xu'bo ngji ndjiojmi ján. Tsa ngji yjonintehe ko tsa najmi ngji, najmi be. Ntíaná xi be. ⁴Yo kint'é én xi najmi tjín xi nkú ts'ín chubahaná, xi tǎjña nkjún nga k'únyaha xuta.

⁵Kama chánka k'uasjé yjona ngat'aha ni xi kamaha ndá xu'bo, tunga najmi chuba chánkaha k'uasjé yjona. Chánka ní k'uasjé yjona ngat'aha nga najmi an ts'an nga'yún xi tjínna. ⁶Tunga tsa chánka k'uasjé yjona, najmi tǎnchajnu tǎnchjat'a tsa b'a ts'ian, at'aha b'a tjín ni xi kuinchja. Tunga najmi b'ahá ts'ian tu xi najmi ch'a b'a kuitsuhu tsa nihi xi nkjún ts'ian ko nihi xi nkjún ts'ín nchja, tsa as'ai najmi b'a tjín niu.

⁷Tu xi najmi chánka kamahana yjona ngat'aha ni chánka xi kis'ejña chjina, Ntíaná kits'ín nibánena nku kjuá'un xi nkú joyaha tsa na'yá kisasíns'ehen yjonintena. Tshu ra nga ndá musuhu ndanindoo ts'ín'unna tu xi najmi chánka kamahana yjona. ⁸Jan niyá tsankihi Ndá

Ntíaná nga kjéxinna kjuá'uun, ⁹tunga b'ahá kitsúna: “Kjuandanahá xi machjéhin, at'ahá ajihín xi najmi tjíhin nga'yún s'ejña chji nga'yúnna.” Kui nga tsjo mahana nga chánka tímahana yjona ngat'ahá nga najmi tjínna nga'yún. B'a ts'ín s'ejña chjhi nga'yúhún Cristo ajinna. ¹⁰At'ahá mjena Cristo, kui nga tsjo mahana nga najmi tjíhinna nga'yún, kō nga ch'on ts'ín nchjayanena xuta, kō nga ndyjat'ána ni xi machjéna, kō nga tsjennkí unkiena xuta, kō nga sakúna kjuanima. At'ahá nk'ie nga najmi tjínna nga'yún, nk'iehé nga tjínna nga'yún.

**B'ì ts'ín y'ejña chji Pablo nga
kjintahá ra xuta ninku Corinto**

¹¹Kuanchja xi nkúhu nku nda xi nchjajnu nchjat'a, tunga juhún kuan'e kjuá'yúnnú nga b'a kuats'ian. Kutsa juhún xi tjíhin nga nda k'úinnú. At'ahá najmi 'yún nk'a tjenna já xi chuba já postruhú mahá yjohō kō chubá ihí mahá yjohō nga an, ndaha tsa b'a xian nga najmi chumi ni chjǎhi ra an. ¹²Kjit'a kjit'a kama kjuankjún kō kjuachánka kō ni xi tsakúchji nga'yúhún Ntíaná ajinnuu. Kui ni xi tsakúchji nga nda postruná. ¹³¿Mí nihi xi kisakúhu xuta ninku xingisoo xi najmi kisakúnuu? Nku tutuhú nga najmi kik'ienénuu yjona nk'ie nga tsátejñajinnuu, xi nkú kits'inka xuta ninku xingisoo. ¡N'e'yún tak'unnú nga b'a ch'on kits'inkonuu!

¹⁴Ja tjíndana yjona nga kfínsenuu niyá xi ma jahan kō ta ndaha nd'ái najmi k'uenénuu yjona. At'ahá najmi ni xi tjínnuu tǎbangisja. Jun ní xi nusinna. At'ahá najmi xi t'ími ntí tjíhin nga kj'uatjō toon xi ts'ínchjén xi cháha. Xi t'ími ní xi chá, kui xi tjíhin nga kj'uatjō toon xi ts'ínchjén ntíhi ndyjun nkini. ¹⁵Kui nga tsjo tjíhinna nga ts'inchjén ngayjee ni xi tjínna kō santaha yjona katjejnú tsa ma tu ngat'ahá ngandanuu. Nk'ie nga 'yún mjena jun, ¿á 'yún ichí tǎn'e mjehenú?

¹⁶N'ekjǎhín nga najmi y'enénuu yjona, ndaha tsa b'a tsu xuta nga nda mañaná xi ts'anachanuu. ¹⁷Já xi kits'inkjísenuu, ¿a kits'inkjǎ jōo tu xi kjé'ahanuu ni xi tjínnuu? ¹⁸Tsankihí Titō nga ngjisenuu kō ta kits'inkjǎ kj'ái nda nts'ée. ¿A ra kikje'áhánuu Titō ni xi tjínnuu? ¿A najmi tu nkuhú tjíntuyá animani an kō Titō? ¿A najmi ta kuihi ni xi tǎn'ei?

¹⁹Kutsa b'ahá ts'ín tǎn'enkjǎnk'un, nga tǎbisinkōi yjoni nga b'ì tǎbixín. Cristo ts'ení kō nginkun Ntíaná tǎchubai. Jun xi tjoni. Ngayjee ni xi tǎn'ei, b'a tǎn'ei tu xi sahánu nginkun Ntíaná.

²⁰At'ahá kjintahana tsa nk'ie nga kujichusenuu, skue nga najmi b'a n'e tintsuḅoo xi nkú ts'ín mjena nga skuenuu. Kō jun kutsa najmi chahánú xi nkú ts'ín mjenuu nga chanú. Kjintahana tsa najmi nkuhú kich'o xinkju, tsa tjín kjuaxintak'un, tsa tjín kjuakjan, tsa tjín xi nk'a tǎf'ahá xinkjín, tsa tjín én tsank'á, tsa tjín xi tǎnchjayané xinkjín, tsa tjín xi ngak'un, kō tsa tjín xi tǎb'éntje kjuachán.

²¹Kjintahana tsa nk'ie nga kuichuse ngáhanuu, sakúna kjuasuba nginkun Ntíaná. Kutsa tjíhín ni nga kjíintat'á nkjin xi tjín ajinnu xi kits'ín ngatitsun ko najmi kjee fikj'áhá ra animahá ngat'ahá ni xi incha kits'ín, xi ts'ín ni xi chuntí nginkun Ntíaná, xi chubá fantukohó xinkjín, xi tu ts'ínkjas'ehén ra yjohó tu mí nihí ni xi nchjahá animahá.

**B'í ts'ín kitsúya Pablo xi nkú ts'íinko
xuta Corinto nga kuichúsehe**

13 Niyá xi ma jahan nga kfínsenuu xu'bǐ. S'enda tu mí kjuahá ni tsa jo ko tsa jan já testiyu kuinchja ni xi be. ²Ja b'a kixinnuu nk'ie nga ngjisenuu niyá xi ma joho ko nd'aǐ nga najmi tíjñajinnuu b'ahá ta tíxin ngáhanuu. Nk'ie nga kfínse ngáhanuu, najmi kama nimana xi kits'ín ngatitsun nk'ie ko ta ndaha tsa kj'áǐ sa. ³B'a ts'ian at'ahá tíbinchísjo ni xi kuakúchji nga éhen Cristo tíinchja. Tunga ajinnuu hú bakúchji nga'yúhun. Najmi tíjñajinnuu Cristo xi nkúhu nku xi najmi tjíhin nga'yún. ⁴Ndaha tsa najmi tsakúchji nga'yúhun nk'ie nga k'ient'á kruu, tunga nd'aǐ nga'yúhun Ntíaná tíjña tík'uhun. Ko jin b'a ta ts'ín najmi tjínni nga'yún, xi nkúhu Cristo nk'ie nga k'ien. Tunga ngandanuu nga'yúhun Ntíaná tintsuba tík'unkohoni Cristo.

⁵Jun chasé suboho yjonuu tsa s'ejinnuu Jesucristo. ¿A najmi mankjihínnuu nga Jesucristo tíjñajinnuu? N'enkjínk'un sisin ní ngáhanu. Nk'ie nga ja kuan'enkjínk'un sisin, kutsa najmi tíjñajihínnuu Cristo. ⁶Nk'ie nga ja kuan'enkjínk'un sisin, tíkuyáha nga s'ejña chji nga éhen Cristo tíchubai. ⁷Tíbinchíhi Ntíaná nga ndahachí najmi ch'on n'ehenu. Najmi b'a tíbixín tsa tu xi chaha nga tín'etjusun sisiin xáni. B'a ní tíbixín tu xi nda n'ehenu, ndaha tsa b'a kuitsu xuta nga najmi nda tín'ei xáni. ⁸At'ahá najmi ma bankín kontraihi ni xi b'a tjín xi bakúya Jesucristo. Jin ní tín'exát'aihi kui niu.

⁹Tsjo manǐ nk'ie nga b'a tsu xuta nga najmi tjínni nga'yún ko nk'ie nga jun xi tjínnuu nga'yún xi tsjá Ntíaná. Tu nku tíbinchihí ri Ntíaná nga kuichúmo xi nkú ts'ín mjehe Ntíaná. ¹⁰Kui kjuaha nga b'í ts'ín tíb'et'áhannuu ni xu'bǐ nk'ie nga najmi tíjñajinnuu, tu xi nk'ie nga kuichusehenuu najmi jíhín nga 'yún ndjá ts'inkonuu. At'ahá Nda Ntíaná kitsjá xána xi má nga ts'ian nga saájiun xi s'ejinná. Najmi kitsjá xána tsa ts'inkjénuu.

B'í ts'ín kits'ínkje Pablo xujuin

¹¹Ko ni xi fekuhu xi xínnuu, já nts'e, kas'enuu kjuatsjo. Tíinchísjo xi nkú ts'ín naxu kamo nginkun Ntíaná. Tjen nga'yúhun xinkiu. Nkuhú kas'eyanuu. Jyu tintsu bakoo xinkiu. Ko k'úéjñajinnuu Ntíaná ma xi tsjáná kjuatjo ko kjuajyu.

¹²B'í ngján súnínohoo xinkiu. ¹³Títs'ínkjinuu kjuasuniña ngayjee xuta xi kikj'áts'e Ntíaná xi tjín ei.

¹⁴Ngatentoo kas'enuu kjuandaha Nda Ntiana Jesucristo ko kjuatjoho Ntiana ko kat'ejñajinnuu Espirituhu Ntiana.